



partii naleraq

22.11.2018

UKA2018/101

Ilaqutariit nukittorsarumallugit ilaqutariinnik siunnersuisartut (coaching) pillugu apequteqaat allaavigalugu oqallinnissamik siunnersuut
(Inatsisartuni ilaasortaq Nivi Olsen, Demokraatit)

Inatsisartunut ilaasortaq Nivi Olsen Demokraatit, Ilaqutariit nukittorsarumallugit ilaqutariinnik siunnersuisartut pillugit tamannalu oqaaseqarfigissavarput.

Nunatsinni ilaqutariit ulluinnarni inuuneranni sutigut tamatigut nukissaqarnerulluta ingerlalluarlutalu inuuneqarnissarput tamatta takorloortarsimassagipput ilimagilluinnarparput, tassami tarneq timilu nukittoq ataatsimoortumik tunngaviulluinnarmata inuunermik nuannersumik pilluarnartumillu ingerlassagutta.

Ilaqutariit inuttut ajornartorsiutinik aqusaagaqarsimasugut amerlavugut, taamatullu ajornartoornermi soorunami inoqatitsinnik pisortanilluunniit ikiorneqarnissarput pisariaqartittarparput, inuttummi piginnaanigut assigiinngillat, ilaqartarpugut ajornartorsiutinik namminneq qaangiisinnaasartunik, aammalu ilaqarpugut pisortanik ikiorneqarnissamik pisariaqartitsisartunik tamannalu aamma periarfissat malunnartumik inunnguanut ajornartorsiueqartunut iluaqutaasaqaaq.

Taamaattumik tamatta pisussaaffeqarpugut inoqaterput ajornartorsiorpat ikiuunnissatsinnut.

Qujanartumik aamma ilaqarpugut ilaqutariit ingerlalluortorpasuit meerartaminnik inuusuttunillu paarsilluartunik, nuannertaqaat taamaattumik ilaqaratta maligassiuilluarnerit taamaattut takullugit misigalugillu pilluarnartaqaaq.

Uani ilaqutariit nukittorsarumallugit saqqummiussaqaarneq soqutiginarluinnarpoq tassami tamatta arlaatigut ingerlalluarutta tamatta inuiaqatigiinni malugissavarput, tamannalu aamma kinguneqassaaq sumiiffikkaarluta suliniarfiusuni ingerlalluarnerunissarput, taammaatoqassappallu soppassuartigut sunniuteqartussaavoq, peqqinnerulernermik, ilinniartut amerlanerulernerannik, suliffiissaleqisut ikilinerannik, tassa oqarluannaraani ingerlalluarnerulernissamut aqqutissat pitsaanerulertussaallutik.

Ilaqutariinnik siunnersuisartut nunatsinni amerlanerusunngorlugit ilinniartitsinerit ingerlanneqalerpata siunissamut aningaasaliinerusoq takusinnaavarput. Tamannalu anguneqassappat isumaginninnermut tunngasunik ilinniartitsinerit annerusisat ingerlattariaqarput illoqarfiit kisimik siunnersuisartunik peqassanngippata.

Nunaqarfinni isorliunerusunilu ulluinnarni inuuneq aamma ilaatigut annertuumik nukittorsagassaavoq, tassami ilinniarsimasut nunaqarfinni isorliunerusunilu amigaataanerat malunnartarmat pingaartumik inulerinermut tunngasut pineqartillugit.

Tassa aallartinniarta arlaatigut inuit misilittagaqarluartut inuulerinermut tunngasunik suliakkerlugit kommunit Namminersorlutik oqartussat ilinniartitsinermik inulerinermut suliaqareersut peqatigalugit aningaasaalerinerillu siunissami aamma amerlanerulernissaat sulissutigalugu.

Kisianni aamma ukiuni kingullerni isumaginninnerup iluani suliniutit annertuut Naalackersuisut aallartitaat puigussanngilagut, suliniutit amerlasuut aningaasarpassuarnik atuiffiusut ingerlanneqarput tamannalu assut iluarisimaarnarpoq.

Ajornartorsiutigut annertugaluqisut qujanartumik siumukarpugut, inuunerissaarnerulernissat annertuumik anguniagaasut takusinnaavarput tassanilu inulerisut kommunillu nersugassaapput naak ilaatigut suliniarnermi avatanngisit atugassarititaasullu ilungersunarsinnaasaraluartut.

Taamatut oqaaseqarluta oqallisaarummut saqqummiussaqaarpugut. Suliniutillu ukiuni kingullerni isumaginninnerup pitsaaliunerullu ilungersuullugu annertusiartuinnarat kommuninut Naalackersuisunullu qujassutigaarput.

Siunissarput qaammariartorpoq, ilinniarsimasut amerliartuinnarput, kinguariillu tullit uagutsinnik atugarissaarnerunissaat anguniarlugu ataatsimoorullugu sulissutigisigu, meeqqat, inuusuttut, ilaqutariillu ingerlalluurtut pilersinniarlugit.

Hans Enoksen